

Isumaginninnermi suliaasaqarfimmi nakkutilliisarneq pillugu Namminersorlutik Oqartussat nalunaarutaat

Isumaginnittoqarfiup aqunneqarnera aqqissuussaaneralu pillugit Inatsisartut peqqussutaanni nr. 11, 12. november 2001-imeersumi § 1, imm. 2 kiisalu Meeqqat tapersorsorneqarnissaannut Inatsisartut inatsisaanni nr. 20, 26. juni 2017-imeersumi § 8, imm. 6, § 11, imm. 5 aamma § 37, imm. 7 malillugit aalajangersarneqarput:

Kapitali 1

Kommunalbestyrelsip ingerlatsineranik pingaarnertut nakkutilliineq

§ 1. Naalakkersuisut qitiusumik nakkutilliinermik ingerlatsivia (Nakkutilliinermik ingerlatsivik) kommunalbestyrelsip ingerlatsineranik aamma inunnik isumaginninnermut inatsisinik aqutsineranik, matumani aamma meeqqat tapersorsorneqarnissaannut Inatsisartut inatsisaannik kiisalu meeqqanut isumaginninnermilu suliaasaqarfiup iluanni pisortat ingerlatsineranni suliat suliarineqartarnerat pillugu inatsimmi aamma pisortat ingerlatsinerat pillugu inatsimmi malittarisassanik pingaarnertut nakkutilliisuusaaq.

Imm. 2. Nakkutilliinermi kommunit aqutsinerat aamma kommunit iluanni paaqqinniffiit pineqarput.

§ 2. Pingaarnertut nakkutilliinermi § 1 malillugu uku pineqassapput:

- 1) § 3 malillugu inatsisit,
- 2) § 4 malillugu aningaasaqarneq, aamma
- 3) § 3 malillugu isumaginninnermi suliaassat suliarineqarnerisa pitsaassusiat.

Imm. 2. Pingaarnertut nakkutilliinerup imarissavai:

- 1) suliaasanik assigiinngiiaartunik misissuineq,
- 2) inunnik ilisimaarinnittunik oqaloqateqarnerit, aamma
- 3) ingerlatsiviup aqqissuussaaneranik misissuineq.

§ 3. Inatsisinik isumaginninnermilu suliaasanik nakkutilliinermi, § 2, imm. 1, nr. 1 aamma 3 malillugit naliliiffigineqassapput ingerlatsiviup:

- 1) maleruagassanik allassimasunik periaasiulersimasunillu malinninnera,
- 2) nassuiaasarnera missiliuisarneralu,
- 3) suliamut paasissutissiinera, suliamik suliarinninnera naammagittaalliutinillu suliaqarnera,
- 4) piginnaasatigut tutsuiginassutsikkullu ajornartorsiutinik suliarineqarnera, aamma
- 5) imminut nakkutilliivigisarnera aamma aqutsinikkut nakkutilliinera.

§ 4. Aningaasaqarnermik nakkutillineq § 2, imm. 1, nr. 2 malillugu nalilernerqassaaq, kommunip isumaginninnermi suliaasaqarfimmi aningaasaqarnermik ingerlatsinera isumannaatsuunersoq, inatsisinillu tunngavilersorneqarnersoq.

§ 5. Nakkutilliinermik ingerlatsivik § 1 malillugu kommunini ataasiakkaani minnerpaamik ukiumut ataasiarluni pingaarnertut nakkutilliinermik ingerlatsisassaaq.

Imm. 2. Nakkutilliinermik ingerlatsiviup nakkutilliinermiut atatillugu ukiut sisamakkaarlugit kommuninut qinigaaffiup iluani illoqarfiit tamarmiusut nakkutilliarforfigisimassavai.

Imm. 3. Nakkutilliinermik ingerlatsiviup nakkutilliinermiut atatillugu imm. 2-mi piffissap pineqartup iluani nammineq naliliinini malillugu nunaqarfiit assigiinngitsut nakkutilliarforfigisimassavai.

§ 6. Pingaarnertut nakkutillineq § 1 malillugu sapaatit akunneri 2 sioqqullugit kommunalbestyrelsimut kalerriutigineqassaaq.

Nakkutilliinermiut nalunaarusiaq

§ 7. Nakkutilliinermik ingerlatsivik § 1 malillugu pingaarnertut nakkutilliinerit tamaasa kingorna nalunaarusiamik suliaqartassaaq.

Imm. 2. Nakkutilliinermiut nalunaarusiaq minnerpaamik §§ 3-mi aamma 4-mi pissutsit tulleriiaarneqarsimasut misissuiffigineqarnerannik aamma isummerfigineqarnerannik imaqassaaq.

§ 8. § 7 malillugu nakkutilliinermiut nalunaarusiaq inaarutaasumik suliarineqannginnerani kommunalbestyrelsimullu nassiutinnginnerani nakkutilliinermiut nalunaarusiaq minnerpaamik ulluni 14-ini kommunalbestyrelsimut tusarniaassutigineqassaaq.

Imm. 2. Nakkutilliinermiut nalunaarusiaq kingusinnerpaamik ullormi nakkutilliiffiusimasumit qaammatit 3-t qaangiutinnginneranni naammassillugu suliarineqareersimassaaq.

Imm. 3. Nakkutilliinermiut nalunaarusiaq Naalakkersuisut nittartagaanni tamanut saqqummiunneqassaaq.

Imm. 4. Nakkutilliinermiut inaarutaasumik nalunaarusiaq kommunalbestyrelsimut nassiunneqareernerata kingorna qaammatit 2-t ingerlareerpata, kommunalbestyrelse Nakkutilliinermik ingerlatsivimmut allakkatigut nassuiaammik nassiussissaaq, tassanilu kommunalbestyrelsip nakkutilliinermiut nalunaarusiami pissutsit assuarineqartut qanoq iliuuseqarfigalugit aaqqiiviginiarnerai allassimassapput.

Kapitali 2

Kommunini meeqqanik nalinginnaasumik inummut sammititamik nakkutillineq

§ 9. Kommunalbestyrelse meeqqat kommunimi atugaannik ingerlaavartumik nakkutilliinissaminut pisussaaffeqarpoq. Meeraq imaluunniit meeqqat eqimattat 18-it inorlugit ukiullit immikkut ikiorserneqarissaminik pisariaqartitsisinnaasut, kommunalbestyrelsimit ilisimaneqalernissaat anguniarlugu, kommunalbestyrelse sapinngisamik siusissukkut nakkutiginnittassaaq.

Imm. 2. Kommunalbestyrelse imm. 1 malillugu nakkutillineq naammassiniarlugu kommunip nunaqarfiinut tamarmiusunut ukiut tamaasa nakkutilliarlorluni tikeraartassaaq.

Kapitali 3

Meeqqanik angerlarsimaffiup avataanut inissinneqarsimasunik inummut sammititamik nakkutillineq

§ 10. Kommunalbestyrelse inissiisoq meeqqap inissinneqarsimasup inissinneqarfiani ukiumut marloriarluni inummut sammititamik nakkutillisassaaq.

Imm. 2. Meeraq kommunimut allamut inissinneqarsimappat, kommunalbestyrelse inissiisuusooq kommunimilu inissiiffiusumi kommunalbestyrelse isumaqatigiissusiorsinnaapput, kommunalbestyrelse inissiisoq sinnerlugu taanna nakkutilliinermik ingerlatsisassaaq.

Imm. 3. Imm. 2 malillugu nakkutilliinermik ingerlatsinissaaq pillugu isumaqatigiissusiortoqarsimappat, kommunalbestyrelsimit inissiisumit sulis akisussaaffigineqarpoq, nalunaarummi uani aalajangersakkat malillugit nakkutillineq ingerlanneqassasoq.

§ 11. § 10 malillugu inummut sammititamik ingerlaavartumik nakkutilliinikkut qulakkeerneqassapput, meeqqamut tunngatillugu iliuusissanut pilersaarutip inissiiviusumi malinneqarnissaa aamma meeqqap pisariaqartitai eqqarsaatigalugit ikiorsiinerup naammattuunissaa siunertamullu naapertuuttuunissaa, taakkununga ilanngullugit:

- 1) meeqqap inissinneqarfigisamini sumiginnarneqannginnissaa imaluunniit innarlerneqannginnissaa,
- 2) meeraq taassumalu angajoqqaavi pisinnaatitaaffimminnik ilisimatinneqarnissaa, aamma
- 3) naammagittaalliutaasinnaasut, meeqqap akuuffigisaasa inerneru meeqqamut, angajoqqaatut oqartussaasunut kiisalu meeqqap sullissisuanut tunniunneqarnissaa.

Imm. 2. Meeqqat tapersorneqarnissaannut Inatsisartut inatsisaanni § 30, imm. 2, nr. 2 malillugu meeraq ulloq unnuarlu paaqqinniffimmut inissinneqarsimappat, nakkutilliinerup aamma qulakkiissavai:

- 1) iliuusissanut pilersaarummi siunertarineqartoq anguniagaasorlu ulloq unnuarlu paaqqinniffiup katsorsaannissamik pilersaarutaani naammassineqassasut,
- 2) meeqqap inissinneqarsimasup pisariaqartitai ulloq unnuarlu paaqqinniffiup perorsaariaasiatigut ikorfartorneqassasut,
- 3) ulloq unnuarlu paaqqinniffik killiffimmik nalunaarusiornermigut aamma katsorsaannissamik pilersaarumminik nutarterisarnermigut ingerlaavartumik nalunaaruteqartassasoq, aamma
- 4) pissaanermik atuisimaneq malitseqartinneqartassasut pissaanermillu atuisimaneq pillugu nalunaarutit tunngavigalugit meeraq ulloq unnuarlu paaqqinniffimmi eqqortumik ikorfartorneqarnersooq naliliiffigineqartassasoq.

§ 12. § 10 malillugu inummut sammititamik nakkutilliinermut atatillugu meeraq kommunalbestyrelsimit oqaloqatigineqartassaaq.

Imm. 2. Meeqqamik oqaloqateqarneq inunnit inissiivimmeersunit najuuffigineqanngitsumik ajornanngippat ingerlanneqassaaq, apeqqutaatinnaq meeraq ilaqutariinni paarsisartuni imaluunniit ulloq unnuarlu paaqqinniffimmi inissinneqarsimaneq.

Imm. 3. Meeraq oqaloqateqarnermini allanit ikiorserneqarnissaminik pisinnaatitaaffeqarpoq.

Kommunalbestyrelsip meeraq tamanna pillugu paasitissavaa. Meeraq pisinnaatitaaffeqarpoq nammineq aalajangiisnaatitaanini malillugu uku ilagisinnaallugit:

- 1) meeqqat illersuisuat isumaginninnermi suliatigut ilisimasalik, imaluunniit
- 2) inuk alla oqaloqateqarnermi ilagisinnaavaa.

Imm. 4. Imm. 3, nr. 2 malillugu meeraq oqaloqateqarnissamut inummik ilaqarniarpat, meeqqallu mianerineqarnissaanut tamanna naapertuutinngitsoq nalilerneqarpat, inuk pineqartoq kommunalbestyrelsimit oqarfigineqarsinnaavoq oqaloqateqarnissamut peqataasinnaanngitsoq. Kommunalbestyrelse aalajangiippat inuk pineqartoq oqaloqateqarnissamut peqataasinnaanngitsoq, oqaloqatigiinnissaq aallartitsinnagu meeqqat illersuisuat isumaginninnermik ilisimasalik kommunalbestyrelsimit aggersarneqassaaq. Aalajangiineq meeraq pillugu iliuusissanut pilersaarummi allaganngorlugu kommunalbestyrelsimit tunngavilersorneqassaaq.

Imm. 5. Meeqqap pisinnaaneqassusaa annikilleriarsimappat, oqaloqatigineqarnerminilu ikiorneqarnissamik pisariaqartitsippat, tamanna kommunalbestyrelsimit immikkut eqqarsaatigineqassaaq meeqqap isumaata tusarneqarnissaa qulakkeerniarlugu aamma tassunga atatillugu periutsinik aamma ikiorsiissutsinik immikkut ittunik atuisinnaavoq.

Imm. 6. Meeqqamik oqaloqateqarnissaq immikkut pissuteqarluni pinngitsoortinneqarsinnaavoq, matumani meeqqap inerissimassusaa pissutaappat imaluunniit meeqqap mianerineqarnissaa pissutigalugu oqaloqateqarnissaq naapertuutinngippat. Oqaloqateqarnissap pinngitsoortinneqarnera meeraq pillugu iliuusissanut pilersaarummi allaganngorlugu tunngavilersorneqassaaq.

§ 13. § 10 malillugu kommunalbestyrelse inummut sammititamik nakkutilliinerminut atatillugu piffimmi inissiiffiusumi pissutsinik ernumanartunik maluginiagaqarpat, oqartussa qarfimmu ingerlatsinerup tunngasutigut nakkutilliinissamik suliaqarnissaminut akisussaataasumut kiisalu kommunalbestyrelsinut inissiisuusimasunut kommunalbestyrelse nalunaaruteqassaaq, meeraq imaluunniit meeqqat piffimmi inissiiffiusumiittut pissutsinik ernumanartunik sunnerneqarsinnaappata.

§ 14. Kommunalbestyrelsip meeraq ingerlaannartumik peersissavaa, meeqqap atugarissaarneranut, peqqissusaanut imaluunniit ineriartorneranut annertuumik innarliisinnaasumik pasitsaassisoqarsimappat uku pissutigalugit:

- 1) meeqqamik amigartumik isumassuineq isumaginninnerluunniit,
- 2) timikkut tarnikkulluunniit persuttaaneq, paarsinerlunneq imaluunniit kinguaassiuutitigut atonerluineq,
- 3) meeqqami imaluunniit meeqqap qanigisaani atonerluinermik ajornartorsiutit, pinerluttutut pissuseqarneq imaluunniit allatigut inuuniarnikkut annertuunik ajornartorsiuteqarneq, imaluunniit
- 4) meeqqap allatigut pissusilersornerani naleqqussarniarneraniluunniit ajornartorsiutit.

Kapitali 4

Ilaqutariinnik paarsisartunik ingerlatsinerup tunngaaticut nakkutilliineq

§ 15. Kommunalbestyrelsip ilaqutariinnut paarsisartunut akuersissummik tunniussaartup ilaqutariit paarsisartut ukiumut ataasiarluni aamma pisariaqartitsineq malillugu ingerlatsinerup tunngaaticut nakkutilliiffigisassavai.

Nakkutilliinikkut qulakkeerneqassaaq ilaqutariit paarsisartut paarsisuunissamut aamma ilaqutariinnut paarsisartunut akuersissutini tunniunneqartuni piumasaqaatinik sulii naammassinnissinnaanersut.

Imm. 2. Ilaqutariinnut paarsisartunut akuersissut piumasaqaatitaqartumik tunniunneqarsimappat piumasaqaatit eqqortinneqarnersut kommunalbestyrelsip nakkutilliinermi misissussavaa.

Imm. 3. Kommunalbestyrelsip ingerlatsinerup tungaatigut nakkutilliinermi ilaqutariinni paarsisartuni pissutsit misissorlugillu ilaqutariit paarsisartut oqaloqatigissavai.

Imm. 4. Kommunalbestyrelsip ingerlatsinerup tungaatigut nakkutilliinermi:

- 1) ilaqutariit paarsisartut nalunaaqqaarluni nakkutilliartorfigisassavai,
- 2) ilaqutariit paarsisartut paasissutissanik piniarfigisassavai, aamma
- 3) meeqqat ilaqutariinni paarsisartuni inissinneqarsimasut paasissutissanik piniarfigisassavai.

Imm. 5. Kommunalbestyrelsip imm. 4, nr. 1 malillugu nalunaaqqaarluni nakkutilliartortarnermi saniatigut ilaqutariit paarsisartut nalunaarfigeqqaarnagit aamma nakkutilliartorfigisinnaavai.

§ 16. § 15 malillugu ingerlatsinerup tungaatigut nakkutilliineq ilaqutariinnik paarsisartunik paarsinermilu suliaasamik qanoq ingerlatsinermik assigiiaartumik, aaqquissuussaasumik tunngavilersorluakkamillu nalilersuissamut tunngavissuissamik ingerlanneqassaaq.

Imm. 2. Nakkutilliineq inunnit suliaq ataqatigiinnissaanik paasinnissinnaasunit taamalu ilaqutariit paarsisartut unammillernartoqartitaannik ingerlariaqqinnissamullu periarfissaannik nalunaaruteqarsinnaasunit ingerlanneqassaaq.

Imm. 3. Kommunalbestyrelsip nakkutilliinermut atatillugu qulakkiissavaa, siusinnerusukkut nakkutilliinermi nalunaarusiaasimasuni oqaaseqaatit, kaammattuutigisimasat peqqussutillu aaqquissuussaasumik malitseqartinneqartarnissaat.

§ 17. Ilaqutariit paarsisartut kommunalbestyrelsimi § 15 malillugu nakkutilliisuusumit qinnuigineqarunik paasissutissat kommunalbestyrelsip ingerlatsinerup tungaatigut nakkutilliinermi pisariaqartitai tunniutissavaat.

Imm. 2. Ilaqutariit paarsisartut paasissutissanik kommunalbestyrelsimut tunniussinnaapput ingerlatitseqqinneq pillugu angajoqqaatut oqartussaassuseqartut akuersiteqqaanngikkaluarlugit pisinnaavoq, ingerlatitseqqinneq nakkutilliinissamut pisariaqartuusorineqarpat.

§ 18. § 15 malillugu kommunalbestyrelse ingerlatsinerup tungaatigut nakkutilliinermi atatillugu ilaqutariit paarsisartuni pissutsinik ernumanartunik maluginiagaqarpat, kommunalbestyrelsimut inissiisuusimasumut kommunalbestyrelse nalunaaruteqassaaq, meeraq pissutsinik ernumanartunik sunnerneqarsinnaappat.

§ 19. Kommunalbestyrelsip meeraq erngerluni peersissavaa, meeqqap atugarissaarneranut, peqqissusaanut imaluunniit ineriartorneranut annertuumik innarliissinnaasumik pasitsaassisoqarsimappat uku pissutigalugit:

- 1) meeqqamik amigartumik isumassuineq isumaginninnerluunniit,
- 2) timikkut tarnikkulluunniit persuttaaneq, paarsinerlunneq imaluunniit kinguaassiuutitigut atonerluineq,

- 3) meeqqami imaluunniit meeqqap qanigisaani atornerluinermik ajornartorsiutit, pinerluttutut pissuseqarneq imaluunniit allatigut inuuniarnikkut annertuunik ajornartorsiuteqarneq, imaluunniit
- 4) meeqqap allatigut pissusilersornerani naleqqussarniarneraniluunniit ajornartorsiutit.

Imm. 2. Kommunalbestyrelsip imm. 1 malillugu meeqqamik paarsisunit peersitsinerminut atatillugu nammineerluni isummerfigissavaa inoqutigiinni meeqqat allat arlaatigut iliuuseqarfigineqassanersut, tassa meeqqat pineqartut ingerlaannartumik peersinneqassanersut imaluunniit ilaqutariinni paarsisartuni najugaqartinneqaannassanersut.

Imm. 3. Kommunalbestyrelsip ingerlatsinerup tungaatigut nakkutilliisuusup aamma utaqqiisaa kommunalbestyrelse inissiisuusooq sinnerlugu meeqqamik peersitsisup kommunalbestyrelse inissiisuusimasooq ingerlaannaq nalunaarfigissavaa. Matuma kingorna kommunalbestyrelse inissiisuusimasooq imm. 1 malillugu inaarutaasumik aalajangiisaaq.

§ 20. § 15 malillugu kommunalbestyrelsip pasitsaappagu ilaqutariit paarsisartut inoqutigiinniluunniit allat aanngajaarniutunik inerteqqutaasunik atuisuusut kommunalbestyrelse tuavionerpaamik ingerlatsinerup tungaatigut nakkutilliartussaaq.

§ 21. § 15 malillugu ingerlatsinerup tungaatigut nakkutilliinermut atatillugu kommunalbestyrelse aanngajaarniutunik inerteqqutaasunik atuisoqarneranik pasitsaassaqaruni inoqutigiinni ataaseq arlallilluunniit aanngajaarniutunik atuisuunersut paasiniarlugu misissorneqarnissaannik qinnuigisinnaavai.

Imm. 2. Imm. 1 malillugu aanngaajaarniutunik atuisuunermik misissuisoqartinnagu, inuk aanngaajaarniutunik atuisuunermut misissuiffigineqartussaaq kommunalbestyrelsimit allaganngorlugu akuersisinneqassaaq. Akuersissuteqarneq pinngitsaaliissutaassanngilaq erseqqissuussallunilu.

Imm. 3. Imm. 2 malillugu inuup inoqutigiinniittup aanngajaarniutunik atuisuunermik misissorneqarnissani akuersaarumangippagu, § 23 malillugu kommunalbestyrelse nakkutilliinermik sakkortunerusumik ingerlatsinnaavoq, imaluunniit Ilaqutariit paarsisartut pillugit Namminersorlutik Oqartussat nalunaarutaanni § 9 malillugu ilaqutariinnut paarsisartunut akuersissut atorunnaarsillugu.

Imm. 4. § 15 malillugu ingerlatsinerup tungaatigut nakkutilliinermut atatillugu imaluunniit allatigut pasitsaassisoqarpat, ilaqutariit paarsisartut ilaat imaluunniit inoqutigiinni alla aanngaajaarniutunik inerteqqusaasunik atuisuusoq, kommunalbestyrelse ilaqutaannik paarsisartunik ingerlatsinerup tungaatigut nakkutilliisuusooq § 15 malillugu ingerlaannaq kommunalbestyrelsimut inissiisuusimasumut nalunaaruteqassaaq. Matuma kingorna § 10 malillugu kommunalbestyrelse inissiisuusimasooq pissutissaqanngitsumik kinguarsaanani inummut sammititamik nakkutilliinermik ingerlatsinissaminut pisussaaffeqarpoq.

§ 22. Kommunalbestyrelse ilaqutariit peqqissussaannik naliliinermut atatillugu, Ilaqutariit paarsisartut pillugit Namminersorlutik Oqartussat nalunaarutaat § 5, imm. 2, nr. 10 malillugu, inoqutigiinni inuk ataaseq imaluunniit amerlanerusut qinnuigisinnaavai peqqissutsimut uppersaammik tunniusseqqullugit. Peqqissutsimut uppersaasaat qaammatit 3 sinnerlugit pisoqaassuseqassanngilaq.

§ 23. Kommunalbestyrelse annertusisamik nakkutilliisoqarnissaanik aalajangiisinnavaoq kommunalbestyrelsimit nalilerneqarpat, immikkut nassuiakkamik annertusisamik nakkutilliisoqarnissaa pisariaqartinneqartoq.

Sivissusissaa pissutsit ataasiakkaat aalajangersimasut suuneri tunngavigalugit aalajangersarneqartassaaq, taamaattorli nakkutilliineq ataaseq sivisunerpaamik qaammatinik 3-mik sivissusseqartassaaq.

Imm. 2. Annertusisamik nakkutilliineq nalunaappaarluni nalunaappaaranilu ingerlanneqarsinnavaoq.

Imm. 3. Annertusisamik nakkutilliinissamut tunngaviusinnaapput:

1) nakkutilliinermiit nalunaarusiaq ataaseq inerniliippat ilaqutariit paarsisartut ajornartorsiutaat immikkut ittut nalinginnaasulluunniit misissoqqinneqarnissaaq pisariaqartoq,

2) ilaqutariit paarsisartut pillugit naammagittaalliutigineqarpata,

3) kommunalbestyrelse nalinginnaasumik immikkulluunniit ittumik ilaqutariinni paarsisartuni pissutsinik ernumanarsinnaasunik meeqqamut paaqqutarineqartumut tunngatillugu imaluunniit meeqqamut pineqartumut eqquisunik maluginiagaqarpat, imaluunniit

4) ilaqutariinni paarsisartuni pissutsit piviusut paaqqutaqarnissamut akuersissut imaluunniit ilaqutariittut paaqqutaqarnissamut akuersissut malillugit ilaqutariittut paarsisuusinnaanermut piimasaqaatinik naammassinninnissamut qulartitsisut.

Imm. 4. Annertusisamik nakkutilliisoqarnissaanik taamaallaat aalajangiisoqarsinnavaoq pissutsit annertusisamik nakkutilliinissamik eqqarsaateqarnermut tunngaviusut pillugit ilaqutariit paarsisartut oqaloqatigineqareernerisigut. Pissutsilli immikkut ittut pisariaqartilerpasut annertusisamik nakkutilliisoqarnissaa ingerlaannartumik aalajangerneqarsinnavaoq.

Imm. 5. Annertusisamik nakkutilliisoqarnissaanik taamaallaat aalajangiisoqarsinnavaoq ilaqutariit paarsisartut pissutsinik aalajangiinermut tunngaviusunik aqqiisinnaanerat aqqeerusunnerallu ilimanaateqarsorineqarpat. Ilaqutariit paarsisartut pissutsinik ernumanartunik aqqiisinnaanerat aqqeerusunnerallu naatsorsuutigineqanngippat ilaqutariinnut paarsisartunut akuersissutip atorunnaarsinneqarnissaa kommunalbestyrelsip aalajangissavaa, § 9 malillugu, Ilaqutariit paarsisartut pillugit Namminersorlutik Oqartussat nalunaarutaanni.

Imm. 6. Kommunalbestyrelse annertusisamik nakkutilliisoqarnissaanik aalajangiisimappat kommunalbestyrelsit inissiisuusut kommunalbestyrelsimit ilisimatinneqassapput.

Nakkutilliinermiit nalunaarusiaq

§ 24. Kommunalbestyrelse §§ 15 aamma 23 malillugit ingerlatsinerup tunngatigut nakkutilliinerit tamaasa nakkutilliinermiit nalunaarusiamik suliaqartassaaq.

Imm. 2. Nakkutilliinermiit nalunaarusiami tulluittut ilisimasaat isumaallu kommunalbestyrelsimit ilanngunneqartassapput:

1) ilaqutariit paarsisartut, tassunga ilanngullugit nammineq meeqqat angerlarsimaffimmi najugaqartut inuillu allat inoqutigiinnut ilaasut, aamma

2) meeraq paaqqutarineqartoq meeqqamullu paaqqutarineqartumut angajoqqaatut oqartussaasut.

Imm. 3. Nakkutilliinermiit nalunaarusiami paasissutissat tulluittut minnerpaamik saqqummiunneqassapput:

1) Ulloq nakkutilliiffiusoq.

2) Kina nakkutilliinermik ingerlatsisimava.

- 3) Nakkutilliartornissaq nalunaarutigeqqarneqarsimanersoq imaluunniit nalunaarutigeqqarneqarsimannginnersoq.
 - 4) Nakkutilliinermut tunngavisoq.
 - 5) Kommunalbestyrelse nakkutilliartortoqannginnerani paasissutissanik sunik piniarsimanersoq.
 - 6) Kommunalbestyrelse nakkutilliinermut atatillugu kikkunnik oqaloqateqarsimanersoq.
 - 7) Ilaqutariit meeqqanik qassinik paaqqutaqarnersut kiisalu meeqqat qassinik ukioqarnersut meeqqallu tapersersorneqarnissamik pisariaqartitaat.
 - 8) Nakkutilliinermi maluginiarneqartut suuneri.
 - 9) Aanngajaarniutunik atuisuunermik misissuisoqarsimappat taakku inerner, tak. § 21
 - 10) Ilaqutariit paarsisartut ilaqutariittut paarsisartutut akuersissummi piumasaqaatinik malinninnerannik naliliineq.
 - 11) Nakkutilliisoqarnerata, matumani aamma annertusisamik nakkutilliisoqarnissaanik aalajangiinerup, ilaqutariinnut paarsisartunut akuersissummik atorunnaarsitsinissamik aalajangiinerup aamma paasissutissanik kommunalbestyrelsimut kommunalbestyrelsinulluunniit meeqqap ilaqutariinnut paarsisartunut inissinneqarnissaanik aalajangiisimasunut ingerlatitseqqissimanerup malitsigisaannik qisuariaataasimasut.
- Imm. 4.* Nakkutilliinermi nalunaarusiaq ilaqutariinnut paarsisartunut tusarniaassutigineqassaaq, tassani tusarniaanermut akissummik tunniussinissamut ullut 14-it piffissaritinneqarlutik. Naammassillugu nakkutilliinermut nalunaarusiap assilineqarnera ilaqutariinnut paarsisartunut nassiunneqassaaq.

§ 25. Kommunalbestyrelsip § 24 malillugu nakkutilliinermi nalunaarusiamut ilanngullugit allassinnaavai:

- 1) paasisimasat ilisimatitsissutillu, aamma
- 2) pissutsit iluarsineqartariaqartut iliuuseqarfigineqartariaqartullu pillugit inassutigisat.

Imm. 2. Imm. 1 malillugu oqaaseqaatit imaluunniit inassutigisat ilaqutariit paarsisartut oqaloqatigineqareerneratigut suliarineqartassapput, aamma pissutsit oqaaseqaateqarnermut imaluunniit inassuteqarnermut tunngavissut qanoq pitsaanerulersinnaanerannut imaluunniit aaqqiiffigineqarsinnaanerannut ilitsersuummik imaqaassallutik.

Kapitali 5

Meeqqanut ulloq unnuarlu paaqqinniffinnik ingerlatsinerup tungaatigut nakkutilliineq

§ 26. Nakkutilliinermik ingerlatsivik Meeqqat tapersersorneqarnissaannut Inatsisartut inatsisaanni § 34, imm. 1 malillugu meeqqanut ulloq unnuarlu paaqqinniffinni, matumani aamma meeqqanut ulloq unnuarlu paaqqinniffiit immikkoortortaanni isumannaallisakkani ingerlatsineq nakkutigissavaa. Ulloq unnuarlu paaqqinniffiup pitsaassusissamik attassiinnarnissaa akuersissummilu piumasaqaatinik naammassinnittuujarnissaa nakkutilliinerup qulakkiissavaa, kiisalu ulloq unnuarlu paaqqinniffiup Naalakkersuisullu akornanni ingerlatsinissamut tunngatillugu isumaqatigiissutaasa naammassineqarnissaa qulakkiissallugu.

Imm. 2. Nakkutilliinermik ingerlatsivik ingerlatsinerup tungaatigut nakkutilliinermut atatillugu ulloq unnuarlu paaqqinniffimmi pissutsit misissorlugillu ulloq unnuarlu paaqqinniffimmi sulisunik oqaloqateqartassaaq.

Imm. 3. Nakkutilliinermik ingerlatsivik nakkutilliinermik suliasamik isumaginninnermini ulloq unnuarlu paaqqinniffimmut nalunaqqaarluni nakkutilliartortassaaq, paasissutissanillu ulloq unnuarlu paaqqinniffimmit pissarsisassalluni.

Imm. 4. Nakkutilliinermik ingerlatsivik imm. 3 malillugu nalunaaqqaarluni nakkutilliartornerup saniatigut aamma nalunaaqqaarani ulloq unnuarlu paaqqinniffimmut nakkutilliartorsinnaavoq.

§ 27. § 26 malillugu ingerlatsinerup tungaatigut nakkutillineq assigiimmik, aaqqissuussaasumik aamma uppersaaserluakkamik ulloq unnuarlu paaqqinniffiup tunniussassaanik inissatigullu atugassarititaanik, kiisalu ulloq unnuarlu paaqqinniffiup suliasamik isumaginnittarneranik nalilersuinissamut tunngavissiisumik ingerlanneqassaaq.

Imm. 2. Nakkutillineq ingerlanneqassaaq inunnit suliap, aaqqissuusaanerup aningaasaqarnerullu ataqatigiinnissaannik paasinnissinnaasunit taamalu ulloq unnuarlu paaqqinniffiup unammillernartoqartitaanik ingerlariaqqinnissamullu periarfissaanik nalunaaruteqarsinnaasunit.

Imm. 3. Nakkutilliinermut atatillugu Nakkutilliinermik ingerlatsiviup ulloq unnuarlu paaqqinniffimmi aqutsisut, sulisut meeqqallu inissinneqarsimasut oqaloqatigalugit peqataatitassavai. Nakkutilliinermut atatillugu meeqqanut angajoqqaatut oqartussaassuseqartut aamma ulloq unnuarlu paaqqinniffiup suleqatigisai oqaloqatigalugit peqataatinneqassapput.

Imm. 4. Nakkutilliinermut atatillugu siusinnerusukkut nakkutilliinermi nalunaarusiaasimasuni oqaaseqaatit, inassutigisimasat peqqussutillu aaqqissuussaasumik malitseqartinneqartarnissaat Nakkutilliinermik ingerlatsivimmit qulakkeerneqassaaq.

§ 28. § 26 malillugu ingerlatsinerup tungaatigut nakkutilliinerup makku imarissavai:

- 1) Meeqqat ilinniarnissamut sulinissamullu periarfissaat.
- 2) Meeqqat nammineersinnaalernissaminnut aamma ilaqtaminnut attaveqaatiminnullu atassuteqarnissaannut periarfissaat.
- 3) Ulloq unnuarlu paaqqinniffiup sullinniagai, matumani ulloq unnuarlu paaqqinniffiup sullinniakkaminut neqeroorutigisaata imarisai kiisalu meeqqat inuunerminnut sunniuteqaqataanerit.
- 4) Ulloq unnuarlu paaqqinniffiup periaasii angusaalu, matumani perorsaanikkut, tarnip pissusaanik ilisimatusarnikkut imaluunniit ilaqutariinnik katsorsaanikkut suleriaatsit.
- 5) Ulloq unnuarlu paaqqinniffimmi aaqqissuussaaneq aqutsisullu.
- 6) Ulloq unnuarlu paaqqinniffimmi sulisoqarnikkut piginnaasat.
- 7) Ulloq unnuarlu paaqqinniffimmi aningaasaqarneq, matumani naatsorsuuteqarnerisuk kukkunersiuusumit akuerineqarsimasumik kukkunersiorneqarsimasumik.
- 8) Ulloq unnuarlu paaqqinniffimmi inissatigut atugassarititat, matumani sullinniakkat pisariaqartitaannut aamma ulloq unnuarlu paaqqinniffiup periaasaanut naapertuunnersut.

Imm. 2. Sammineqartut tamarmik arlalitsigut naapertuuttunik tunngavilersorlugit itisilernerqassapput, ulloq unnuarlu paaqqinniffiup tamakkiisumik siumullu isigisumik aaqqissugaanik takutitsisumik.

§ 29. Nakkutilliinermik ingerlatsiviup misissussavai ulloq unnuarlu paaqqinniffik ileqqoreqqusanik malinninnerisuk.

§ 30. § 26 malillugu ulloq unnuarlu paaqqinniffimmi Nakkutilliinermik ingerlatsivik nakkutilliinermik ingerlatsinerup tungaatigut nakkutilliinermi Nakkutilliinermik ingerlatsivik paasissutissanik

pisariaqartitaminik qinnuiginnikkuni, ulloq unnuarlu paaqqinniffiup tunniutissavai.

Imm. 2. Ulloq unnuarlu paaqqinniffimmit paasissutissat Nakkutilliinermik ingerlatsivimmut tunniussaapput, ingerlatitseqqinneq angajoqqaatut oqartussaassuseqartoq akuersisinngikkaluarlugu pisinnaavoq, ingerlatitseqqinneq nakkutilliinissamut pisariaqartuusorineqarpat.

§ 31. Nakkutilliinermik ingerlatsivik ulloq unnuarlu paaqqinniffimmi pissutsinik ernumanartunik maluginiagaqarpat, Nakkutilliinermik ingerlatsivik Isumaginninnermut Aqutsisoqarfimmut aamma kommunalbestyrelsinut inissiisuusimasunut nalunaarfiginnittassaaq, meeraq imaluunniit meeqqat pissutsinik ernumanartunik sunnerneqarsinnaappata.

§ 32. Nakkutilliinermik ingerlatsivik kommunalbestyrelsimut inissiisuusimasumut ingerlaannaq nalunaaruteqassaaq, meeqqap atugarissaarneranut, peqqissusaanut imaluunniit ineriartorneranut annertuumik innarliisinnaasumik pasitsaassisoqarsimappat uku pissutigalugit:

- 1) meeqqamik amigartumik isumassuineq isumaginninnerluunniit,
- 2) timikkut tarnikkulluunniit persuttagaasarnera, paarinerlunneqarnera imaluunniit kinguaassiuutitigut atornerlunneqarsimanera, imaluunniit
- 3) meeqqap atornerluinermik ajornartorsiutaanik, pinerluttarneranik imaluunniit allatigut pissusilersornikkut naleqqussarniarnikkulluunniit ajornartorsiutaanik naammaginangitsumik katsorsaaneq.

Imm. 2. Nakkutilliinermik ingerlatsiviup nakkutilliinermini allatigulluunniit paasiguniuk meeqqap inissitap imm. 1-imi pissutsit pineqartut naammagittaalliutigisimagai imaluunniit nalunaarutigisimagai Nakkutilliinermik ingerlatsiviup misissussavaa naammagittaalliut imaluunniit nalunaarut malitseqartinneqarsimanersoq.

Peqqusineq

§ 33. Nakkutilliinermik ingerlatsivik ulloq unnuarlu paaqqinniffimmut peqqussuteqarsinnaavoq. Peqqusinerup eqquutsinneqarnissaanut piffissaliussaq Nakkutilliinermik ingerlatsiviup aalajangersarsinnaavaa.

Imm. 2. Peqqussuteqarnissamik taamaallaat aalajangiisoqarsinnaavoq pissutsit peqqussuteqarnissamik eqqarsaateqarnermut tunngaviusut pillugit ulloq unnuarlu paaqqinniffimmi sulisut oqaloqatigineqarenerisigut. Pissutsilli immikkut ittut pisariaqartilerpassuk peqqussuteqarnissaq ingerlaannartumik aalajangerneqarsinnaavoq.

Imm. 3. Peqqussuteqarnissamik taamaallaat aalajangiisoqarsinnaavoq ulloq unnuarlu paaqqinniffiup pissutsinik aalajangiinnermut tunngaviusunik aaqqiisinnaanerat aaqqeerusunnerallu ilimanaateqarsorineqarpat.

Imm. 4. Imm. 1 malillugu peqqussummik eqquutsitsinissaq akuersisummik peqaannarnissamut piumasaqaatinngortinneqarsinnaavoq.

Imm. 5. Ulloq unnuarlu paaqqinniffik imm. 1 malillugu peqqussummik eqquutsitsinnaangippat ulloq unnuarlu paaqqinniffimmut akuersissutit atorunnaarsinneqarnissaa naalakkersuisoqarfiup isumaginninnermut akisussaasuusup ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat malillugu aalajangersinnaavaa.

Imm. 6. Nakkutilliinermik ingerlatsivik peqqusippat, imm. 4 malillugu piumasaqaatinngortinneqarsimasumik Nakkutilliinermik ingerlatsivik kommunalbestyrelsit inissiisuusut tamatumanga ilisimatinneqassapput.

Annertusisamik nakkutilliineq

§ 34. Nakkutilliinermik ingerlatsivik annertusisamik nakkutilliisoqarnissaanik aalajangiisinnaavoq, Nakkutilliinermik ingerlatsivimmit nalilerneqarpat, immikkut nassuiakkamik annertusisamik nakkutilliinissaq pisariaqartinneqartoq. Sivilissusissaa pissutsit ataasiakkaat aalajangersimasut suuneri tunngavigalugit aalajangersarneqartassaaq, taamaattorli nakkutilliineq ataaseq sivilisunerpaamik qaammatinik 3-mik sivilissuseqartassaaq.

Imm. 2. Annertusisamik nakkutilliineq nalunaaqqaarluni nalunaaqqaaranilu ingerlanneqarsinnaavoq.

Imm. 3. Annertusisamik nakkutilliinissamut tunngaviusinnaapput:

- 1) nakkutilliinermik nalunaarusiaq ataaseq inerniliippat ulloq unnuarlu paaqqinniffiit ataasiakkaat ajornartorsiutaat immikkut ittut nalinginnaasulluunniit misissoqqinneqarnissaat pisariaqartoq,
- 2) ulloq unnuarlu paaqqinniffiup naammagittaalliutigineqarsimanera,
- 3) ulloq unnuarlu paaqqinniffimmi Nakkutilliinermik ingerlatsivimmit maluginiakkat nalinginnaasut imaluunniit immikkut ittut, imaluunniit
- 4) ataatsimut naliliineq malillugu ulloq unnuarlu paaqqinniffik pisariaqartinneqartumik pitsaassuseerussimasoq.

Imm. 4. Annertusisamik nakkutilliisoqarnissaanik taamaallaat aalajangiisoqarsinnaavoq pissutsit annertusisamik nakkutilliinissamik eqqarsaateqarnermut tunngaviusut pillugit ulloq unnuarlu paaqqinniffimmi sulisut oqaloqatigineqareernerisigut. Pissutsilli immikkut ittut pisariaqartilerpasut annertusisamik nakkutilliisoqarnissaa ingerlaannartumik aalajangerneqarsinnaavoq.

Imm. 5. Annertusisamik nakkutilliisoqarnissaanik taamaallaat aalajangiisoqarsinnaavoq ulloq unnuarlu paaqqinniffiup pissutsinik aalajangiinermut tunngaviusunik aaqqiisinnaanera aaqqeerusunneralu ilimanaateqarsorineqarpat. Ulloq unnuarlu paaqqinniffiup pissutsinik ernumanartunik aaqqiisinnaanera imaluunniit aaqqeerusunnera ilimagineqanngippat, ulloq unnuarlu paaqqinniffimmut akuersissutip atorunnaarsinneqarnissaa naalakkersuisoqarfiup isumaginninnermut akisussaasuusup Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat malillugu aalajangersinnaavaa.

Imm. 6. Nakkutilliinermik ingerlatsivik annertusisamik nakkutilliisoqarnissaanik aalajangiippat, kommunalbestyrelsit inissiisuusut Nakkutilliinermik ingerlatsivimmit ilisimatinneqassapput.

Nakkutilliinermik nalunaarusiaq

§ 35. Nakkutilliinermik ingerlatsivik §§ 26 aamma 34 malillugit ulloq unnuarlu paaqqinniffimmi ingerlatsinerup tungaatigut nakkutilliinernit tamanit nalunaarusiortassaaq.

Imm. 2. Nakkutilliinermik nalunaarusiami paasissutissat tulluuttut minnerpaamik saqqummiunneqassapput:

- 1) Ulloq nakkutilliiffiusoq.
- 2) Kina nakkutilliinermik ingerlatsisimava.
- 3) Nakkutilliartorneq nalunaarutigeqqaarneqarsimanersoq imaluunniit nalunaarutigeqqaarneqarsimannginnerersoq.
- 4) Nalinginnaasumik imaluunniit annertusisamik nakkutilliineq pineqarnermoq.
- 5) Nakkutilliinermik ingerlatsiviup nakkutilliartortoqannginnerani paasissutissanik sunik piniarsimanersoq.
- 6) Nakkutilliinermik ingerlatsivik nakkutilliinermiut atatillugu kikkunnik oqaloqateqarsimanersoq.

- 7) Meeqqat qassit inissat eqqarsaatigalugit ulloq unnuarlu paaqqinniffimmi inissinneqarnissamut allatsissimanersut kiisalu meeqqat qassinik ukioqarnersut meeqqallu tapersersorneqarnissamik pisariaqartitaat
- 8) Ukiumi kingullermi pissaanermik atuinerit qassiusimanersut.
- 9) Nakkutilliinermi maluginiarneqartut suuneri.
- 10) Ulloq unnuarlu paaqqinniffiup meeqqanik paaqqinniffimmiittuutigineqartutut nalunaarneqarsimasunik katsorsaanissamik isumassuinnissamillu suliaassaminik isumaginninnissamut piumasaqaatinik malinninneranik naliliineq.
- 11) Ulloq unnuarlu paaqqinniffimmut akuersissummi piumasaqaatit ulloq unnuarlu paaqqinniffimmit sulii malinneqarnersut pillugu naliliineq.
- 12) Nakkutilliisoqarsimanerata kingunerisaanik akuersissummik atorunnaarsitsinissamik peqqusinerup aamma paasisutissanik kommunalbestyrelsimut kommunalbestyrelsinulluunniit inissiisimasunut ingerlatitseqqissimanerup malitsigisaannik qisuariaataasimasut, matumani annertusisamik nakkutilliisoqarnissaanik aalajangiineq.

§ 36. § 35 malillugu inaarutaasumik nakkutilliinermi nalunaarusiap suliarineqariarluni ulloq unnuarlu paaqqinniffimmut nassiunneqannginnerani nakkutilliinermi nalunaarusiap minnerpaamik ulluni 14-ini ulloq unnuarlu paaqqinniffimmut kiisalu oqartussaqaarfimmut ulloq unnuarlu paaqqinniffimmik ingerlatsisumut tusarniaassutigineqassaaq.

Imm. 2 Nakkutilliinermi nalunaarusiap naammassillugu kingusinnerpaamik ullormi nakkutilliiffiusimasumit qaammatit 3-t qaangiunneranni suliarineqareersimassaaq.

Imm. 3. Nakkutilliinermi nalunaarusiap Isumaginninnermut Aqutsisoqarfimmut kiisalu kommunalbestyrelsinut meeqqanik ulloq unnuarlu paaqqinniffimmut inissiisimasunut ilisimatitsissutitut nassiunneqassaaq.

Imm. 4. Nakkutilliinermi nalunaarusiap Naalakkersuisut aamma ulloq unnuarlu paaqqinniffiup nittartagaanni avammut saqqummiunneqassaaq.

§ 37. Nakkutilliinermik ingerlatsiviup § 35 malillugu nakkutilliinermi nalunaarusiami allassinnaavaa:

- 1) paasisimasat ilisimatitsissutillu, imaluunniit
- 2) pissutsit iluarsineqartariaqartut qisuariarfigineqartariaqartullu pillugit inassutigisat.

Imm. 2. Imm. 1 malillugu oqaaseqaatit imaluunniit inassutigisat ulloq unnuarlu paaqqinniffiup oqaloqatigineqareerneratigut suliarineqartassapput, aamma pissutsit oqaaseqaateqarnermut imaluunniit inassuteqarnermut tunngaviusut qanoq pitsaanerulersinnaanerannut imaluunniit aaqqiiffigineqarsinnaanerannut ilitsersuummik imaqaassallutik.

§ 38. § 35 malillugu Nakkutilliinermik ingerlatsivik nakkutilliinermi nalunaarusiami ulloq unnuarlu paaqqinniffimmut inassutiginnissinnaavoq imaluunniit peqqusisinnaavoq pissutsit inassuteqarnermut imaluunniit peqqussuteqarnermut tunngaviusut qanoq aaqqiivigissallugit naatsorsuutigisat allaganngorlugit pilersaarummik suliaqarfigissagai, matumani piffissamik killiliussisassaaq.

Kapitali 6

Naammagittaalliuteqarneq

§ 39. Kommunalbestyrelsen nalunaarut manna malillugu aalajangiineri Isumaginnittoqarfiup aqunneqarnera aaqqissugaaneralu pillugit Inatsisartut peqqussutaanni aalajangersakkat tunngavigalugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

Imm. 2. Nalunaarut manna tunngavigalugu Nakkutilliinermik ingerlatsiviup aalajangiineri aqutsinermi oqartussaasunut allanut naammagittaalliuutigineqarsinnaanngillat.

Imm. 3. Nalunaarut manna malillugu aalajangiinernut meeqqat suliat imminnut tunngassuteqartut pillugit naammagittaalliuuteqarnissaminut pisinnaatitaapput.

Kapitali 7

Atuutilerfia

§ 40. Nalunaarut ulloq 1. maj 2019 atuutilerpoq.

Imm. 2. Ilutigitillugu Isumaginninnermut tunngasunik nakkutilliineq pillugu Namminersornerullutik Oqartussat nalunaarutaat nr. 6, 16. februar 2006-imeersoq atorunnaarsinneqarpoq.

Namminersorlutik Oqartussat, ulloq 3. april 2019

Martha Abelsen

/

Julie Præst Wilche

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

